



## **POLIS DAN HAK-HAK ASAS ANDA**

### **1.**

#### **APABILA DIBERHENTIKAN POLIS**

##### **1.1 Sekiranya polis tersebut tidak memakai pakaian seragam**

Tanya beliau mengenai kad kuasa beliau

##### **1.2 Kad Kuasa Polis**

Warna Merah: Anggota polis tersebut telah digantung. Beliau tidak mempunyai apa-apa kuasa untuk berbuat apa-apa. Anda tidak perlu mengendahkan beliau.

Warna-warna lain:

- Warna Biru: Polis yang berpangkat Inspektor dan keatas.
- Warna Kuning: Polis yang berpangkat dibawah Inspektor
- Warna Putih: Polis Simpanan

Ambil perhatian nama dan nombor anggota polis pada Kad Kuasa Polis.

### 1.3 **Di dalam Pakaian Seragam**

Ambil perhatian nama dan nombor anggota polis pada pakaian seragamnya.

### 1.4 **Kenderaan Polis**

Ambil perhatian tentang nombor pendaftaran pada kereta peronda, motosikal atau kenderaan polis tersebut.

## 2. **APABILA DISOAL OLEH POLIS**

### 2.1 **Pengenalan Anda**

Anda cuma perlu berikan nama, kad pengenalan dan alamat sahaja.

### 2.2 **Seandainya ditanya soalan-soalan lain**

Anda boleh bertanya, “Adakah saya ditahan?”

### 2.3 **Bilakah anda ditahan**

Anda ditahan apabila anggota polis itu

- menjawab “ya” pada soalan di atas
- beliau tidak membenarkan anda meninggalkan tempat tersebut atau ingin membawa anda ke balai polis
- apabila anda digari

Jika anda tidak ditahan anda boleh berlepas dari tempat tersebut atau enggan mematuhi arahan beliau untuk ke balai polis atau tempat lain jika diarahkan.

### 2.4 **Bilakah anda tidak boleh ditahan**



Polis tidak boleh menahan anda semata-mata kerana anda berkemungkinan menjadi seorang saksi dan polis ingin mengambil kenyataan saksi daripada anda (Kenyataan saksi/112).

### **3. SOALJAWAP OLEH POLIS TANPA PENAHANAN**

#### **3.1 Kenyataan saksi/112**

Apabila pihak Polis menjalankan siasatan mengenai sesuatu kes dan berpendapat bahawa anda mempunyai maklumat/pengetahuan mengenai kes tersebut, pihak Polis boleh menyoal anda dan menulis jawapan-jawapan anda (Kenyataan saksi/112).

#### **3.2 Permintaan rasmi/tidak rasmi**

Selalunya, pihak polis membuat permintaan tidak rasmi untuk anda memberikan Kenyataan saksi/112. Sekiranya tempat dan waktu adalah bersesuaian, beri kerjasama. Sekiranya tidak, beritahu Polis yang anda akan berbuat demikian pada tempat dan waktu yang bersesuaian.

Sekiranya anda enggan bekerjasama sama-sekali, Polis akan mengeluarkan suatu perintah rasmi yang ditandatangani oleh pegawai penyiasat (Perintah Polis) untuk meminta anda bekerjasama.

#### **3.3 Memberikan Kenyataan saksi/112**

Anda mempunyai hak untuk meminta seorang peguam menemani anda. Ini adalah dinasihatkan.

Di dalam memberikan Kenyataan saksi/112, anda boleh enggan menjawab apa-apa soalan yang boleh mendedahkan anda kepada apa-apa kesalahan jenayah.

- Bawa bersama anda buku nota atau kertas tulisan (nota peribadi).
- Tulis semua soalan yang ditanya di dalam nota peribadi.
- Pastikan anda memahami setiap soalan yang ditanya.
- Ambil masa dan fikir berhati-hati sebelum menulis jawapan di dalam nota peribadi.
- Baca jawapan anda kepada Pegawai Polis yang menyoal anda.
- Simpan nota peribadi untuk rujukan di masa hadapan.

### 3.4 **Menandatangani Kenyataan saksi/112 anda**

Sebelum menandatangani kenyataan anda, baca soalan-soalan dan jawapan-jawapan yang ditulis oleh Pegawai Polis secara berhati-hati.

- Bandingkan kenyataan yang anda disuruh tandatangani dengan nota peribadi anda.
- Anda mempunyai hak untuk membuat pembetulan/perubahan kepada kenyataan anda sebelum menandatangani.
- Tuliskan tandatangan anda di bawah ayat penghabisan kenyataan anda.

Sekiranya anda gagal mematuhi, anda tidak boleh ditangkap. Akan tetapi, itu adalah satu kesalahan dan pihak Polis boleh meminta Majistret untuk mengeluarkan suatu waran terhadap anda untuk memaksa anda bekerjasama.

## 4. **PENAHANAN OLEH POLIS**

### 4.1 **Apabila ditahan tanya, “mengapa saya ditahan ?”**

Setiap tahanan yang dibuat tanpa dimaklumkan sebabnya adalah satu tahanan yang salah.

### 4.2 **Jangan melawan**



Anggota polis mempunyai hak untuk menggunakan kekerasan yang munasabah sekiranya anda melawan.

#### 4.3 **Tanya – “Ke balai mana encik hendak membawa saya ?”**

Anggota polis tersebut hendaklah membawa anda dengan segera ke balai polis berdekatan dan tidak ke tempat lain.

#### 4.4 **Apa perlu dibuat setelah dimaklumkan tentang tangkapan.**

Anda mempunyai hak untuk membuat panggilan telefon.

Buat panggilan kepada keluarga, peguam atau Pusat Bantuan Guaman.

Maklumkan mereka:-

- Anda telah ditangkap.
- Masa, tempat dan sebab-sebab tangkapan .
- Pengenalan anggota polis yang menangkap.
- Balai polis kepada mana anda dibawa.

#### 4.5 **Apa terjadi selepas tangkapan?**

Anda boleh ditahan sehingga 24 jam:

- Di balai polis atau
- Di lokap balai polis

dengan tujuan untuk membantu siasatan polis.

### 5. **HAK-HAK ANDA KETIKA DALAM TAHANAN**

#### 5.1 **Hak untuk menghubungi Peguam**



Awak mempunyai hak untuk berhubung dengan peguam dan nyatakan kehendak anda untuk berbuat demikian.

## 5.2 **Pakaian**

Anda boleh mempunyai satu set pakaian semasa di dalam lokap.

## 5.3 **Barangan Persendirian**

Anggota polis hendaklah merekodkan segala barangan persendirian anda di dalam penjagaan yang selamat.

Barangan-barangan ini hendaklah dipulangkan sebaik sahaja anda dilepaskan.

## 5.4 **Kebajikan**

Anda dibenarkan untuk mandi 2 kali sehari.

Sekiranya anda sakit, anda boleh mendapatkan rawatan dengan segera.

Anda hendaklah diberikan makanan, minuman yang wajar dan mencukupi sepanjang tahanan.

## 5.5 **Berapa lama polis boleh menahan anda**

Polis boleh menahan anda sehingga 24 jam untuk siasatan.

Adalah menjadi tanggungjawab polis untuk menyiapkan siasatan dalam tempoh 24 jam dan melepaskan anda secepat yang mungkin.

Seandainya polis tidak dapat menyelesaikan siasatan mereka di dalam masa 24 jam, Polis mesti membawa anda ke hadapan seorang Majistret untuk satu Perintah Reman untuk menyambung penahanan anda melepasi 24 jam.

## **6. PERINTAH REMAN OLEH MAJISTRET**

### **6.1 Siapakah Majistret**

Majistret adalah seorang pegawai Mahkamah yang mempunyai kuasa samada untuk memberi Perintah Reman untuk menahan anda lebih dari 24 jam.

### **6.2 Tujuan Perintah Reman**

Ia adalah bertujuan untuk memberikan lebih banyak masa kepada Polis untuk menyelesaikan siasatan mereka dan memutuskan samada terdapat keterangan untuk membuat pertuduhan kesalahan jenayah terhadap anda.

Pihak polis tidak boleh memohon Perintah Reman semata-mata bagi tujuan mendapatkan kenyataan daripada anda.

### **6.3 Jangka hayat Perintah Reman**

Apabila anda dibawa ke hadapan Majistret untuk Perintah Reman, Polis mestilah memberikan sebab-sebab mengapa anda perlu ditahan melebihi 24 jam. Majistret bertugas mestilah memberikan pertimbangan yang wajar terhadap sebab-sebab yang diberikan Polis.

Polis selalunya akan memohon penahanan lanjutan selama 14 hari atau kurang.

Majistret, selepas memberikan pertimbangan wajar sebab-sebab yang diberikan oleh Polis, mempunyai budi bicara:

- untuk tidak membenarkan Perintah Reman; atau,
- untuk membuat Perintah Reman untuk suatu jangkamasa yang lebih pendek dari yang dipohon Polis.

Polis boleh membuat lebih daripada satu permohonan untuk Perintah Reman. Walaubagaimanapun, anda tidak boleh ditahan lebih daripada 15 hari kesemuanya.

#### 6.4 **Apakah langkah yang perlu anda ambil sekiranya anda dihadapkan ke Majistret**

Maklumkan kepada Majistret bahawa:

- anda ingin mendapatkan representasi peguam dan memaklumkan kepada LAC serta keluarga anda.
- anda ingin mendapatkan bantuan perubatan kerana anda tidak sihat atau telah didera.
- anda telah diugut atau didera semasa di dalam tahanan (jika ada).
- anda telah dinafikan dengan makanan / air / pakaian yang sewajarnya, tandas atau perhatian perubatan yang sewajarnya semasa di dalam tahanan (jika ada).
- samada polis telah menjalankan penyiasatan semasa anda di dalam tahanan.

#### 6.5 **Pohon untuk Perintah Reman yang singkat**

Pohon untuk Perintah Reman yang singkat sebelum Majistret memberi Perintah Reman. Beri alasan-alasan (sebagai contoh: “saya akan bekerjasama dengan polis di dalam siasatan”, “saya akan hadir setiap kali polis memerlukan saya” dan sebagainya).

### 7. **PEMERIKSAAN BADAN TANPA TAHANAN**

#### 7.1 **Bilakah ia boleh dilakukan**

Sekiranya anda berada di tempat (sebagai contoh: karaoke / kelab) di mana polis sedang melakukan serbuan atau mencari sesuatu (sebagai contoh: dadah berbahaya), polis berhak untuk melakukan pemeriksaan badan/beg anda tanpa menahan anda.



Ia hanya boleh dilakukan dengan kehadiran pegawai polis yang berpangkat tidak kurang daripada Inspektor.

## 7.2 **Apakah yang perlu anda lakukan**

- Jangan benarkan polis untuk memasukkan tangan mereka ke dalam saku atau beg anda.
- Kosongkan saku / beg anda di hadapan polis secara sukarela untuk memastikan anda dapat mengawasi barangan anda.
- Keluarkan barangan anda satu demi satu. Setiap kali, sebut sebagai contoh “purse”, “kunci”, “kad pengenalan” dan sebagainya.
- Apabila saku / beg anda kosong, terbalikkan saku / beg tersebut.

## 7.3 **Hak-hak anda**

- Wanita hanya boleh diperiksa badan mereka oleh pegawai polis wanita sahaja.
- Setiap pemeriksaan badan perlu dilakukan dengan penuh sopan (sebagai contoh: bahagian sulit tidak boleh disentuh).
- Tidak ada undang-undang membolehkan anda dibogelkan.

## 8. **PEMERIKSAAN BADAN APABILA DITAHAN**

### 8.1 **Bilakah polis boleh melakukannya**

- Polis mempunyai kuasa untuk melakukan pemeriksaan badan bagi objek yang berhubung dengan kesalahan yang disyaki.



- Pemeriksaan badan harus dilakukan di dalam kawasan yang terlindung. Adalah menjadi hak anda untuk diperiksa di kawasan yang terlindung.

## 8.2 **Pemeriksaan badan secara bogel**

Walaupun semasa anda ditahan, tidak ada undang-undang membolehkan Polis memaksa anda dibogelkan.

Sekiranya anda dipaksa untuk bogel / diugut sekiranya anda enggan berbogel:

- Bantah.
- Pastikan anda dapatkan nama pegawai polis tersebut.
- Buat laporan selepas kejadian tersebut.

## 9. **SOAL-SIASAT OLEH POLIS SELEPAS DITAHAN**

### 9.1 **Kenal pasti pegawai polis yang menyoal-siasat anda.**

Pastikan nama / pangkat pegawai polis yang menyoal-siasat anda.

### 9.2 **Hak memilih untuk berdiam diri**

Polis lazimnya akan memulakan perbualan ramah mesra (sebagai contoh: soalan-soalan mengenai keluarga anda, kawan-kawan dan sebagainya). Anda harus bersopan. Jangan khuatir untuk berdiam diri. Itu adalah hak anda.

### 9.3 **Polis inginkan kenyataan bertulis (Kenyataan 113) daripada anda**

Polis akan menyoal anda dan kemudian menulis jawapan anda. Anda hanya perlu memberi nama penuh, umur, alamat dan pekerjaan (Butir-butir peribadi).

Selain daripada memberi Butir-Butir Peribadi, anda berhak untuk berdiam diri.

Sekiranya anda memilih untuk berdiam diri, katakan: “Saya akan menjawab di Mahkamah”.

#### 9.4 **Polis tidak berhak untuk memaksa anda memberi Kenyataan 113**

Setelah memberi Butir-Butir Peribadi tetapi polis mengugut untuk memaksa anda untuk memberi kenyataan bertulis:

- bertenang dan berdiam diri;
- polis tidak berhak untuk mengugut, memukul atau memaksa anda membuat kenyataan bertulis.

Sekiranya anda telah diugut, dipukul ataupun dipaksa, buat laporan Polis terhadap Pegawai Polis berkenaan secepat mungkin. Ini adalah hak anda.

#### 9.5 **Sekiranya anda ingin memberikan Kenyataan 113**

Ikut perkara-perkara di dalam perenggan-perenggan 3.3 dan 3.4 di atas.

Sekiranya anda tidak mempunyai buku nota/kertas tulisan, minta dari Pegawai Polis.

Kenyataan 113 anda boleh digunakan sebagai keterangan terhadap anda di dalam Mahkamah untuk membuktikan:

- anda telah mengakui/membuat pengakuan terhadap kesalahan jenayah sebagaimana yang dituduh; atau,



[www.malaysianbar.org.my](http://www.malaysianbar.org.my)

- anda telah mengakui/membuat pengakuan mengenai sebarang fakta yang boleh menunjukkan bahawa anda bersalah di dalam kesalahan yang dituduh.